

**Cannabisoliat CBD-mik (cannabidiolimik) imallit aamma annerpaamik 0,2 % THC-mik (tetrahydrocannabinolimik) imallit unioqqutitsinertaqanngitsumik pisiarineqarsinnaanngornissaannut nioqqutigineqarsinnaanngornissaannut kiisalu eqqunneqarsinnaanngornissaannut Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Justus Hansen, Demokraatit)

**Annerpaamik 0,2 procentimik THC-mik akulinnik cannabisimik nioqqutissiat (tassani cannabisolia aamma eqqarsaatigalugu) inerteqqutaajunnaarsinnissaannik Naalakkersuisut suliniuteqaqqullugit Inatsisartut aalajangiiffigisassaattut siunnersuut.**

(Inatsisartunut ilaasortaq Peter Olsen, Inuit Ataqatigilt)

**Danskit misileraanerattut ittumik nakorsat ataasiakkaat immikkut akuersissummik piniaqqaaratik nakorsaatit akuerisaanngitsumik cannabisimik nakorsaasiillutik nakorsaanissamik periarfissaqarlersillugit misileraanermik aallartitsinissamik Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Peter Olsen, Inuit Ataqatigilt)

### **Akissuteqaat**

(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)

### **Siullermeerinnineq**

Cannabisoliat annerpaamik 0,2 % THC-mik akullit pisiarineqarnissaasa, tunineqarsinnaanissaasa eqqunneqarsinnaanissaasalu inerteqqutaajunnaarsinneqarnissaat pillugu aalajangiiffigisassatut siunnersuuteqarnerannut Inatsisartunut ilaasortat, Justus Hansen, Demokraatit aamma Peter Olsen, Inuit Ataqatigiit, Naalakkersuisut qujaffigaat.

Aammattaaq Peter Olsenip, Inuit Ataqatigiit, danskit misileraanerattut ittumik nakorsat ataasiakkaat immikkut akuersissummik piniaqqaaratik nakorsaatit akuerisaanngitsumik cannabisimik nakorsaasiillutik nakorsaanissamik periarfissaqarlersillugit misileraanermik aallartitsinissaq pillugu aalajangiiffigisassatut siunnersuuteqarneranut Naalakkersuisut qujaffigaat.

Inatsisartut aalajangiiffigisassaattut siunnersuutit pingasut siuliani taaneqartut tulliuuttuni ataatsimoortillugit sammineqassapput.

Aanngajaarniutit pillugit inatsit Kalaallit Nunaannut atuuttoq Aanngajaarniutit pillugit Inatsimmi nassaassaavoq, ukunanilu takuneqarsinnaalluni inatsisitigut nalunaarut nr. 391, 21. juli 1969-imeersoq aammalu aanngajaarniutit pillugit nalunaarut nr. 559, 9. november 1984-imeersoq.

Inatsit taanna malillugu aanngajaarniutini, tassunga ilanngullugu cannabisimik cannabisolianillu eqqussineq annissinerlu, tunisineq, pisineq, tunniussineq, tigusineq, pilersitsineq, suliarinnineq tigungmiaqarnerlu inertequtaapput. Tamanna atuuppoq 0,2 % ataallugu THC-mik akoqartoqaraluarpataluunniit.

Naalackersuisut isumaqarput innuttaasut aanngajaarniutini pissarsinnaatinnissaat ataatsimut isigalugu tunuarsimaarfigineqartariaqartoq. Taamaakkaluartoq cannabisimik nioqutissiat THC-mik akui 0,2% tikillugu akoqarsinnaanerisa pillugit maanna malittarisassat oqilisarneqarnissaannut Naalackersuisut piareersimapput. Tamatumunnga nutaamik inatsisiliornissaq pisariaqarpoq suliarlu aallartereerluni.

Ullumikkut nakorsaatit cannabisimik akullit THC-millu akoqartut nunatsinni peqqinnissaqarfimmit tunniunneqarsinnaapput. Taakku nunap immikkoortuini nakorsaanernit Dronning Ingrid-illu Napparsimavissuani nakorsaanernit suliasaqarfimmik immikkut ilisimasaqartunit kisimi tunniunneqarsinnaapput. Katsorsaatissatut siullertut toqqarneqanngisaannarput, nakorsaatilli allat inuunermut navianartorsiortitsisumik nappaammut annertusiartuinnartumut anniarunnaarsitsinnaanngippata pisuni ataasiakkaani atorneqarsinnaallutik. Taamaalilluni nunatsinni kræftimik nappaatilinnut nakorsaatinit pigineqartunit allanit iluaquserneqarsinnaanngitsunut annertuumik anniaatilinnut atorneqarnerupput.

Tamatatumunnga tunngatillugu Naalackersuisut sulissutigerusuppaat peqqinnissaqarfimmi aaqqissuusinerup annertusarneqarnissaa. Taamaattumik danskit misiliutaasumik aaqqissuussaannut ilanngunnissaq misissorneqassaaq. Misiliutaasumik aaqqissuussineq Danmarkimi ingerlasimavoq januarip aallaqaataaniit 2018-imiit ingerlasussaalluni decemberip 31-iata tungaanut 2021-imi. Danmarkimi aaqqissuussineq ukiuni sisamani ingerlasoq nioqutissat cannabisimik akullit nakorsaatit akuerineqanngitsut pillugit Naalackersuisunit nunatsinnilu peqqinnissaqarfimmit maannamut ineriartortoqarnera taamaallaat malinnaavigineqarsimavoq. Naalackersuisut danskit oqartussaaffiitut saaffiginninniarpoq periarfissat piumasaaqatillu paasiniallugit, aaqqissuusinermut ilanngunnissaq siunertaralugu.

Cannabisimik tunisassiat 0,2 % tikillugu THC-mik akoqarsinnaanerisa Naalackersuisut suliniuteqarnermikkut aallartereerpaat. Tamatuma saniatigut danskit misiligutitut aaqqissuusinerannut ilanngunnissaq misissuiffigineqassaaq.

Tamanna tunngavigalugu siunnersuutit akuersissutigineqarnissaat Naalackersuisut inassutigaa.